



Akɔm gi ci Anim
Kɛŋɛrawet Reezinte o
Joowo

**Zoozok ci lotinto
weregewe o Joowo**

Zoozok ci adomnyai weregewe o Joowo

Nothing Can Separate Us
From the Love of God

**Words of Comfort from
the Bible**

Passages from the Word of God



Akóm gi ci Anim Keñerawet Reezinte o Joowo

Anyak weregge nici zoosok ci atovyai Weregge o Tammo Murleye. Ajoyai Weregge o Tammo ween Terkediin o Colai Murleye ñaati akole ñinto www.bible.is. Ma anyak baryak karabon een jinen weregge nico itoontek ol koko:

Liñliñon o Abalyin zoz Murleye
PO Box 64
Juba, South Sudan
murle_project@sil.org

Ayeeda Kole o Weregge o Tammo Amerika weregge o kazi Akóm gi ci anim keñerawet reezinte o Kiristo zooze ween kemeribonjin, ma bar otontak Majma o Mecekiya o Jonglei Libir ci jenu o Kanisa o Mecekiyo Junub Sudana gool ci ka kabaliyi weregge nico Murleye. Atal zin Kanisa o Mecekiyo Junub Sudana SIL o Junub Sudano tirtente uneen giye o aruwan weregge nico.

Ma Kole o Weregge o Tammo Amerika alañ aronj kaal ci ajowa liñliñonte nico ka kurukta wereggenya o Tammo kokom rak zoosok ci ajina niigi ola. Ñaan baal akanan irkitowe ween 1816 e akana niigi liñliñon ci abalyi Weregge o Tammo zoosowe ci ol oogi goole ci ka kobowoi ñaati akeebine. Ma Kole o Weregge o Tammo Amerika boorit ci Dowin o Kole o Weregge o Tammo baal wernonj zee makacin adaala loocok ci ayaaj kaboot ram. 200 e, ka kuruume gi o aroonny. Abon zin niina akeebi Weregge o Tammo ma oobei ol oogi buk. Mā aroonnyu wereggenya oogi ci aruyai Weregge o Tammo ijinit Kole o Weregge o Tammo Amerika omoloye koko 1-800-32-BIBLE karabon ayeedei ol koko:

Kole o Weregge o Tammo
101 N Independence Mall East
8th Fl
Philadelphia PA 19106.

Cino websait o Kole o Weregge o Tammo Amerika! www.bibles.com

Nothing Can Separate Us From the Love of God

This book contains portions of the Murle Bible. The Murle New Testament can be found online at www.bible.is. Enquiries and comments about this book can be sent to:

Murle Language Project
PO Box 64
Juba, South Sudan
murle_project@sil.org.

The American Bible Society published the original ‘Nothing Can Separate us From the Love of God’ in English but has given permission to East Jonglei Presbytery of the Presbyterian Church of South Sudan to translate this into Murle. The PCSS thanks SIL, South Sudan for the technical help with the formatting and printing of this book.

The American Bible Society is a not-for-profit organization which publishes the Scriptures without doctrinal note or comment. Since 1816, its single mission is to make the Bible available to every person in a language and format each can understand and afford. Working toward this goal, ABS is a member of the United Bible Societies, a worldwide effort that extends to more than 200 countries and territories. You are urged to read the Bible and share it with others. For a catalog of other Scripture publications, call the American Bible Society at 1-800-32-BIBLE or write to:

American Bible Society
101 N Independence Mall East
8th Fl
Philadelphia PA 19106.

Visit the ABS website! www.bibles.com

Murle New Testament © 1996 Wycliffe Bible Translators, Inc.
Other content translated from ‘Nothing Can Separate Us From the
Love of God’ © 1999 American Bible Society used with
permission
The Murle New Testament was originally published in 1996 by The Bible
League

First Edition	September 2017
Trial Edition	November 2015

Publisher: East Jonglei Presbytery of Presbyterian Church of South
Sudan
Place of Publication: Juba, South Sudan



Zeedinet ci Zoozowu

Kanan	5
Areezet Jooi Ageet Dook Ɔrɔt Ele.....	7
Karome Naaga ki Jook Iinya Dook	11
Agamanet Jooi ma Areezet Ageet Dook	15
Azedjai Jooi Olee o Aborne Loota	19
Mayo Nun mã Kadaayito Ŋaan Kavɔ Kojowa gi o Kare Naaga Joowa Nɔko	23
Aku Bonati Ween Didi Kare Naaga Joowa Doon	29
Aterkedek Jooi Roget o Abil Been Neen ɔl o Atu Nɔɔɔ Dook	35
Kanaryonek ɔl o Ajowa Piryakzet.....	39
Yelzan o Wereganya o Tammo	41





Kanan

Mã amena kaala ci agooni noko nõkõ, avu koca tiñeere iinya ci amõõrni ðl dook kanonot. Ma apirna tiñeere ðl ci meelik goole nico. Ma agidõ tiñeere ðl dook korogjowẽ ma anyak zinzeeti cigeec o bornet nõõñ ma acin eleeti akõm eet ci ka kitirit nõõgõ. Ma acin eleeti kizik aavtiyo doon, ma aavtiyek daayiz doon.

Maje weregewe o Joowo anyak gi ci adõõi ma aricani aduyai azi ne; mayo nun mã õõõñ rogeti kotoboret, karabõñ etedoyet ðl ageet, karabõñ kojokta eleeti kaavtiyo doon, Jooi onai areezet karomẽ kibeem ageet. Jook iimi ziniz ma amena areezet ageet nõkõ, kõõrkõr kibeem ageet nõkõ mayo nun mã izi lõõci gerze. Akeebonek reezinet been bonat onin dook nõõõõ. Mã anyak gi ci akanai, abon kaada gi o azi Põl ne; Akõm gi ci anim keñerawet ageet reezinte o Joowo ñaaten Yesu Kiristo.

Kiyo akeebi zozok ci werege ci Joowo ayeedi weregewe nico noko, ono reezinet o eelanet Jooi ki rewinet been lotinet o azõõzeke niini ðl o apirna ma agide looce nico.





Areezet Jooi Ageet Dook Ɔroot Elɛ

Aduwa Wɛrɛgɛ o Tammo gi ci azooni jooi eet ci deer labak calaŋ acin nɔɔnɔ elɛ eeci bitaalu, karabɔŋ acin tuwen cin, karabɔŋ een alaazet cin baayiza. Aduwaket Wɛrɛgɛ o Tammo reezinet o Joowo ki zuuti o azooni Jooi ɔroot ɔl o apez gɔnɔgja ma aanyek kiziti kaal ci labak. Ayelzeket Yesu reezinet nico alye onin elɛ, ki demzinte onin ki kaale ogin agɔɔn been baayize onin baal abaayi loota ŋina e.

Akunak Yesu Looc ka kizi ruguzoi, calaŋ een Pakcoi

Ma agereny Yesu molooye ci appe azi nɛ; ɛeti ci atuyan aneet alaŋ atuyan aneet doon bar atu baaba o itoonanan aneet buk. Ma ɛeti ci acinan aneet icin buk niini eet o itoonanan aneet. Kakun zin naana o ka kizi voortin ci loocu, ka mǎ anyak eet ci atuyan aneet ka calaŋ bodo niini aavi muura.

Mǎ anyak eet ci azii zɔɔz caan o ma alaŋ atu, alaŋ naana kapayei nɔɔnɔ gerzitin. Eeci alaŋ kakun naana o ka kiya kapayek looc gerzitin bar ka korogoz. Ma ɛeti ci aburnan aneet, ma alaŋ agama zɔɔz caan o, anyak eet ci ŋaan apayek nɔɔnɔ gerzitin iitene ci aɔorneke lɔoci e tɔ.

Eeci akom gi ci kaduwa naana owe caan doon, bar baaba o itoonanan aneet neen o ilotekan gi o abil been neen.

Ma gi ci kaduwa naana o kaduwa eo aduwakan baaba o itoonanan aneet.

Jon 12.44-50

Areɛz Yesu ɔl o abor gɔnɔgja

Ma vuruta oton Yesu ɛnito ɔto, mazi ɛaan awɔ gɔɔla nɔko, icin Matiyu o gɔɔn alot meeri aavi loota maktabe onin. Ma anek Yesu nɔɔnɔ ne, “Nowawan”

Enico eɛ itija Matiyu ma ano nɔɔnɔ.

Mazi akɔ adake Yesu korge o Matiyu, anyak buk ɔl ci meelik ɛinaante olee o gɔɔn alot meeri kibeɛn ɔl oogi olee o gɔɔn alaɛ azooni lotinok o Juz. Ma avu azɔɔ but niigi ki Yesu kibeɛn nuyak ogin ɛaatodoi. Mazi acin ɔl ogen olee o Parici gi nico enektek nuyak o Yesu ne; madim alaani cunooɛ o azɔɔ ki ɔl ci gɔɔn alot meeri o ki ɔl ci ger o naa?

Mazi azii Yesu gi nico, ebedeke niini nɔɔgɔ enek ne: Gɔɔn ɔl ci alaɛ amɔɔr arɔɔɛ niigi akim? Bar arɔɔɛ akim ɔl ci amɔɔr doon. ɔto zin orooɛit keɛɛ ci zɔɔz o aduyai weregewe o Joowo azi ne; alaɛ karoɔɛ utuguuzeyan keɛg ceen todoyok o doon, bar karoɔɛ zinzeeti bonat ka kagama todoyok cugooc o. Mazi naana alaɛ kakun o ka kiya Kotowa ɔl o abon, bar kakun o, ka kiya kotowo ɔl ger.

Matiyu 9.9-13

Awuyet Yesu kiziti gotonogi ki nonogi

Ma anek Yesu nuyak bodo ne, “Keen naana keet dikiron. Maje baaba niini eet o keetu neen. Ma anyak otoon calaŋ abiir ŋaatan, aŋeedak niini tuu. Maje oton o goon abiir, azeeɕ ka kibiir juruun. Inoko zin niiga itilizawu giye o zɔɔz baal kaduwakuŋ e. Oromtozeyan zin niiga aneet, maje buk naana karomonekuŋ igeet. Akom goon laadun otoon ci abiir alye cin doon calaŋ akanonek keet dikiron. Ma alaŋ aromonekaŋ niiga aneet, eelnu buk koca niiga noko. Keen zin naana keet dikiron, maje niiga eeginu oto. Ma eeti ci aromonekan aneet, maje buk naana karomonei noono, eet o abiir juruun neen. Eeci ma kadeyai naana ŋaatunoon, akom niiga doon gi ci ka utuguz. Ma anyak eet calaŋ aromonekan aneet, ateedjak koca niini looc kiyo keet otoni o, ma araabjai, ma alote ka kakatozek goo. Ma oromtozeyan niiga aneet, ma aavu zɔɔz onane ŋaatunoon, olla ma anyak gi ci aroonyu, ma ajinu Jook, ajowanu. Ma abiirnu juruun, anyak gi nici baaba diŋdiŋon. Ma izitu koca didi niiga nuyak cigan. Ma naana kareezuŋ igeet kiyo areezan buk baaba aneet o. Uruktek zin zɔɔ looc reezinte can o. Ma azuunu lotinok cigan o, urukteyu koca zɔɔ looc reezinte onan didi kiyo kazoone naana lotinok o baaba, ma buk karuwei zɔɔ looc reezinte onin o.

“Kaduwakuṅ zin naana zɔɔz nico o, ka talniin onane kaavu ṅaatunooṅ, ka zin talniin unooṅ kidikir. Zɔɔz zin caan kilotekuṅ ce. Eɓɛɛzto niiga dook kiyo buk kareezuṅ naana igeet o. Akom bodo reezinet ci adikir kujuk ci adaakni ɛeti ṅaati laṅotigin. Zin mā agoonu niiga kaal ci kilotekuṅ naana igeet o, izitu koca niiga laṅotigan didi. Inoko zin alaṅaan naana kawuyuṅ bodo igeet iziti gabara, eeci gɔɔn gabarenti alaṅ gi ci agɔɔn alaani onine aga. Bar zin inoko naana kutuwuṅ igeet iziti laṅotigan, eeci kuduwayuṅ igeet kaal o kaziikna ṅaati baaba dook. Alaṅ aṅeranaṅ aneet niiga, bar kaṅeranuṅ igeet naana ka ibiirta kebere ci ɛel been neen. Ka zin kaanyuṅ baaba igeet gi ci olla ajinu niiga nɔɔnɔ zaare ogan. Inoko zin kilotekuṅ gi ci kanekuṅ ne, Eɓɛɛzto niiga dook.”

Jɔn 15.1-17

Iinyaye baal ṅaan abaayi Yesu loota e, ilalek waanice niini Jook o anyak dɔyiz ṅaati aluweke nɔɔnɔ ka kitirit Jooi nɔɔnɔ kemez daayiz. Iziwun ni waanice Jooi nɔɔnɔ, eeci acelbezan niini ɛle, ma areez Jook ma agɔɔn kaal o arɔɔṅ Jooi doon. Mayo nuun een niini ṅeerti Joowo ɛle o, ɛdemɛz niini gɔɔl ci azooni zɔɔz o Joowo gidente baal apirnanɛ e nɔkɔ. Ma zin giye baal ozooti niini demzinte nico, izi niini gɔɔl ci ɛlyanɛ ɔl dook o azooni zozok ogin

Ibiro 5.7-9



Karome Naaga ki Jook Iinya Dook

*Mayo nun mā anyak lɔɔci kaal ci iina, aavi Jooi ŋaatinai,
mayo nun gɔɔn mā kapirna arɔɔŋ ka kagaac aavi niini tɔ.*

Ma yo nuun Kaavtiz naaga ŋaati Muur Gili- inyik Aavi Jooi ŋaatinai Tɔ Nɔkɔ

Towayoi caan neen Manyi o;

aanyan kaal o karoŋ rogete onan dook.

Aanyan niini aneet niini aneet kege ŋaati aliz,
ma akoyan vitenane ci anyak mam ci lilim.

Aanyan niini aneet dɔyiz ci colai,
ma arayinan golowe ci abon

giye o aterkedekan aneet.

Mayo nun mā kawɔ ŋaati muur,

alaŋ kanyei ŋoliin been neen Manyi,
eeci karome naana kibeen ineet.

Eeci keet unune towawinto abekan aneet.

Idimdimaneyan niina aneeta dayiin ogan,

maje ɔl o amarninan aneet olla aŋamnekan.

Atalnanan niina aneet kiyo eeti o atalna kernoi o titiny
o,

ma aanyan maam ci kawudi kodoca tɔc.

Kagawa zin bonati unune ki reezinet unun aavu ŋaatan
nɔkɔ been neen.

Ma een tiŋeere ceez cune o, kɔrɔɔg can kabaaye ŋinti
ŋaan karogne o dook.

Beninok 23

Mayo nun mā kigide mā ɔkɔmawet gi ci abon kare, ŋaan aavi Jooi ŋaatinai nɔkɔ

Aŋarowɔ ni Jona ijin Manyi ween Tammu onin ŋaati
aave kulugit keeŋa eecitɔ. Ma azi ne,
“Manyi onan, piryakzete caan kipiiraye noko kutuwin
ineet ma abarizeyan,
ŋaabaal kagawe eɛ ka waan kadaak kutuluweyin ineet
karoŋ tirten iziiyan ni.

Ujukeyan waanice niina aneeta liil boloc eecitɔ,
ukuuyawan ni maama ugune aabur amacucɔ
walaganyak dim.

Bar kaze ne, ‘Ɔtɔɔyan ŋuume unun,
bar bodo ŋaan kacin ceez unun alile labak.’

Koowa waanice naana maami eecitɔ,
ma izi daayizi aɔɔn nɔkɔ.

Ma ukuuyawan maama lai,
ma adonozeyan boyitot ɔɔ.

Koowa zee ma kakɔ karuum biyen o eel liil keeŋa
loota.

Konyogozeya ŋinite izi neen.

Bar zin ineet Manyi ween Tammu onan neen o iranawan

aneet loowe o daayizo.
Izi waanice rogeti zigit nyaatan,
kaadawin ni ineet,
mazi kawuyin,
iziiyan ceeze unun alile.
Ma zin ol o adiñdiñan joowanɛ o adilyai eegin kaal o
labak,
otonjit niigi reezinet unun anyayei niina nɔɔɔ.
Bar zin tiñeere kagoonekin naana ineet todoyok,
ma kaben beniinok ci kanyiin ineet zaany;
ma kagoon kaal o katerkedi dook,
eeci aku rokzen nyaatun ineet Manyi.”

Jona 2.1-9

Akɔm gi ci ka keñerawet ageet reezinte o Joowo

Inoko zin kaale nicoko dook, mã koromte naaga
kibeen Jook didi ñeneen zin bodo koca ci ka komoget
ageet o? Akɔm kina! Ñaan Jooi kujurai ñeerin nyaati
itoonake looc, bar itoona niini nɔɔɔ kiya kadaak nyaaten
ageet. Zin yo mã aanyet niini ageet ñeerin onin ɛɛ o,
alañ tiñeere bar aanyet niini ageet kaal o aterkedeket
dook.

Ñeneen zin bodo ci ka kɔkɔlak ol o ɛñera Jooi rooni o?
Akɔm kina! Eeci aanyet ageet kobonta ñuume onin Jooi

alya. Ɗeneen zin bodo ci ka kizi ne, keegin naaga gerze o? Akom kina! Eeci Yesu Kiristo adaak ɗaatinai ma itinawi Jooi noono daayiza, ma inoko aavi niini aziite o Joowo azo tammu tadena ma ilalek niini Jook ɗaaten ageet.

Gitaaz zin ci ka keɗerawet ageet reezinte o Kiristo o? mayo nuun ma inaket kaala ci gerze kiyo piryakzet ki gidɛn, ki magizeti ,ki maatiz, kibeɛn zozo ci arɔɔɗ kurruktet ol ageet kadaayit o, akom gi ci ka keɗerawet reezinte o Kiristo been neen. Abil kiyo ayeedi weregewe o Joowo azi ne; aɗon goon daayizi ɗaaten ageeta iinya dook noke, eeci kanuyin naaga ineet. Agoonet goon ol ageeta kiyo eezana o avoyi ol tonɗin o, bar zin naaga kamog kaal ci ger apirnanet ageet noko dook lai ɗaaten dooyiz o Yesu Kiristo o areezet ageet.

Kaga zin naana ɔroɔt ele akom gi ci ka keɗerawet ageet reezinte o Kiristo, yo nuun een daayiz, karabon een roget, karabon een toonnyak o tammo, karabon een miniɗ, karabon een dooyiz oma ci abil Tammu tadena, karabon een loota, karabon een kaal ci ka keyelizyai katin, karabon een kaal ci eel Tammu keɗa, karabon een kaal ci eel todo loota. Alaɗ kaalyana nicigi dook ka keɗeryawet ageet reezinte o Joowo kanyak naaga ɗaaten Manyi onai Yesu Kiristo.

Rom 8.31-39



Agamanet Jooi ma Areezet Ageet Dook

Piryakzet kibeem eleeti wucez avunaket ageet gerzitina zee ma aanyet kababanit gi ci bar kizik Jooi otoŋawet ma alaŋan azuunet. Alaŋ zin zɔɔz nici aleemnyai, eeci gɔɔn oŋneket Jooi baciinok ogaac, iinya dook ma areezet ageet dook.

Amena Jooi Aruwek zɔɔ looc reezinte onin

Abon kanaati Manyi alye onan dook!

Abon kanaati zaar ogin alile rogete onan dook.

Abon kanaati Manyi alye onan dook ma

alaŋ kaanyi kereyeyan bonati onine.

Eeci nɔɔnɔ neen o oŋnekan baciinok ogan,

ma aruguzan gɔɔn moorizoi.

Nɔɔnɔ neen o azuunan daayiza,

ma amayukan reezinte onin giye o kawucneke nɔɔnɔ.

Aanyan niini kaal o karoŋ rogete onan dook

ka zin kemeda kizi colak ma kadoi kiyo zerooc o.

Apak Jooi kaal gole ci eelane ɔl o agide,

ma aanyek nɔɔgɔ kaal o agano ki nɔɔgɔ.

Eyelek baale niini zozok ogin Mosis,

ma aanyek ɔl o Israyil kicinit liŋliŋonok ogin adɔɔi.

Jooi niini reezinet ma awucnek ɔl

ma alaŋ abor noŋ gaaga,
ma anyak reezinet ci abil been neen.

Alaŋ niini amena ŋaati agernyeket
ma alaŋ aborneket noŋ ŋinti reen.
Alaŋ niini arooket ageet giye o kaganon ki royinet,
ma alaŋ acaca kaal ci agano ki baciinok ki gerzitin
onai.

Kiyo adewo Tammu taden ki tado noko been neen o,
appe but reezinet online olee o aŋole noŋo noko.
Aaranet niini ageet baciinok ogaac dook koŋt many
kiyo adewo jeen ki nyagi o.
areez zin buk Manyi ol o aŋole noŋo kiyo goŋn areez
eeti dool ogin o.

Aga gi baal laadun eenycanet niini ageet e,
ma aada gi baal eenycanet niini laadun tadowaca
e.

Abil zin ageet rogeti cinai o kiyo arte o,
kiroktai ma kalina kiyo koroboli o too goŋn anyarnyar
zee

mazi ivaan ŋoŋti arabjai ma adicai lai calaŋ bodo
kacin o.

Maje ol dook o aŋole noŋo, aanyek niini noŋgo kobonta
noko been neen,

ma aavi reezinet online ŋaatineen noko been neen.
Agoonek noko ol o azooni terkedin onin,
ma azii lotinok ogin ma azooni zinzeeti laliza.

Aarek Manyi lecer onin avuzito tammu taden
ka kizi alaan ci kaal dook.

Atanaaz Manyi niiga toonnyawa o tammu tadenu

adoknu ma azuunu ricaniinok ogin

ma aziknu zoozok o aduwakuṅ niini igeet.

Atanaz Manyi niiga doyizowa dook o tammu tadenu,

niiga gabara o agoonu gi o arɔɔṅ niini.

Atanaz Manyi kaala dook o ɛnycanuṅ niini

vitenane ogin abal.

Abon zin kanaati Manyi buk naana alye onan ɛɛ.

Uduutayet Jooi reezinet onin ageet dook

Inoko zin kiziti naaga ɔl ci kabon ŋuume o Joowo giye o katuwi Yesu Kiristo, ma kanyayit naaga ganɔn ki Jook ŋaaten nɔɔnɔ. Ma Yesu Kiristo iiten baal kagaman naaga nɔɔnɔ e zɛɛ been inoko o, aanyet niini ageet kagac deten o aku Joowa. Katalne zin naaga ɔrɔɔt ɛɛ, eeci kaga tiŋeere kazɔl naaga kibeen nɔɔnɔ titinyɔn onin. Ma katalne buk naaga mate gɔɔn kagide, eeci kaga giden ademezet gɔɔl ci ka gɔɔn kɛmɛzti piryakzet zinzeetine ci alal. Mazi kamez piryakzet zinzeetine ci alal, atalne Jooi ma kaga naaga nɔkɔ tiŋeere agooneket niini ageet kaal o aterkedeket dook. Zin naaga katu didi alaṅ niini alabanet ageet kaale nicoko, eeci ayeleket niini reezinet o areezet niini ageet ɔrɔɔt. Ma buk aareket niini reezinet zinzeeti ogaac dɔyize o vɔṅiz onin anyet ageet.

Baale akɔ mazi ɔkɔmawet ageet gɔɔl ci ka kitiriti eleeti

ogaac dooyize cinai doon e, iiya Yesu Kiristo adaak nyaaten ageet o onenu iitene o anrak Jooi noono. Ma gi nici adoi kak oroot eete ci deer nyaati adaakni goone ci abon. Karabon koca gon te eti oman agama daayiz ci elane eet ci abon kiyo eti nici o labak. Bar zin Jooi eyeleyet reezinet onin areezet ageet oroot giye o itonane Kiristo kiya kadaak nyaatinai iiten baal nyaan kanyayi naaga on onoro e. Inoko zin kobonta nyume o Joowo giye o iiya adaayi Yesu Kiristo nyaatinai. Inoko zin kaga naaga aruguzet tijeere niini ageet payinte o Joowo. Baale inaan Yesu kiya kadaak baciinowe ogaac e, kegin naaga mirok ci kamarno ki Jook. Mazi iiya adaak nyerin Yesu e, abadayet niini ageet kiziti lanoten ki noono bodo. Ma giye o kizitoi naaga lanoten ki Jook, kaga aruguzet tijeere Yesu ageet, eeci Itina niini daayiza ma inoko arogi. Alan een zin bar gi dook neen nici, bar buk kaanyek naaga Jook zaany nyaaten Manyi onai Yesu Kiristo, eeci abadaayet niini ageet kizito lanoten ki Jook.

Rom 5.1-11

Aanyet Jooi yubzen nyaaten Yesu

“Ivitayan zin niiga dook o apirnanu kaale o loocu, aneet ka kiiya kaanyon igeet uyubuzit. Agamta demziin onan zinzeetine ugooc dook. Ivita edemezto nyaatan, eeci aneet alalnan ziniz, ma kacelbezan ele. Ka zin ivita ojokta niiga yubzen eleetine ugooc kizi zinzeeti tiv. Eeci demziin ci ka kanyon naana igeet o alan adoi.”

Matiyu 11.28-30



Azɛɛɔjai Jooi Olee o Aborne Loota

*Ayelza Jooi weregewe onin gi ci areezi niini ɔl o apirna
kiyo ɲaai o bɔyɛk ki dool ween booyok,ki ɔl o atɔɔyai
vitenane ugeec abaayi, ki ɔl ween mirɔk. Amena zin inoko
o reezinet onine ki bonat onin olee o abor gɔnɔgja baayiza,
ma aanyek kiziti kaal ci celbez.*

Acin Jooi ɔl o apirna ma azooni nɔɔgɔ

Adiɲɲiɲ Manyi Jooi kujuk joowane dook, ma ajuk
dooyizi onine dooyizok dook. Anyak niini diɲɲiɲɔn been
dooyizok dook, ma agano ɲaati kazikni nɔɔnɔ. alaɲ niini
ɛɛz ɔl ma alaɲ agama moɲanin ɔla. Arɔɔɲ niini booyok,
ki ɲaai o bɔi kanyayit ɔl juruun, ma areez ɔl ween mirɔk
ɲaati aroɲen ki ɔl ogaac yaak, ma aanyek nɔɔgɔ dayiin,
ki ruumanɛ. Abon zin buk niiga areezu nɔɔgɔ, eeci
baale niiga alya eeginu mirɔk masire. Abon zin aɲolinu
Manyi ween Jook unooɲ ma abon adiɲɲiɲɲanu nɔɔnɔ
doon. Aanycek zinzeeti kiimte ɲaaten nɔɔnɔ ma abon
agoonu kaal o aterkedu zaare ogin doon. Atanaaz nɔɔnɔ
ween Jook unooɲ ma icintu keberene ugooc maany kaal
ogin baal agɔɔn ɲaatunooɲ e dook, waanbaal avɔyi jiji-

tugooc Masire e, eegin waanice niigi eet iiyu kamoto
noko, bar inoko Manyi ween Jook unoon aanyuŋ azaace
iziti mele kiyo monyonya o tammu keenu o.

Lotinok o vuruto 10.17-22

Yesu niini gabaren o Joowo o baal apirna ma aborne

Azi zin Manyi ne,

“Aleemnyi tiŋeere liŋliŋoni ci gabaren caan o kanyak
keen,

ma tiŋeere anaat ol dook noon.

Aruk waanbaale ol ci meel kulurkuluri ŋaati acini noon,
uruwe waanice niini zee ma kizik alaŋ een eet ci
deer.

Bar zin inoko ol ci meel loota ŋina ibiirit ooti diŋdiŋonte
onin,

makacin alaata o loocu okoma gi ci aduwa giye o
abiirti noon ooti.

Acin tiŋeere niigi noon,

ma ajeez gi ci ŋaan laadun kagaac.

Ma abariz ol zoz ci azi ne,

“Akom eet ci utu zoz ci kazikna noko

ma akom eet ci icinun dooyiz ci Joowo ayelzai noko.

Bar zin baale nica baabani o Joowo doon o aanyek
gabaren onin

kitiŋa kiyo keet o aduŋna ŋaao adai o.

Akóm waanice nɔ́nɔ́ dɪ́ndɪ́nɔ́n ki linat
ci ka kaanyet kiyezta nɔ́nɔ́.
Akóm waanice gi ci alinaket ñaatin
ma buk akóm gi ci ameneket ñaatin.
Kepezta ni naaga nɔ́nɔ́ ma kaburna nɔ́nɔ́.
Emez ni niini piryakzet nice ki ɛɛ wucez
Akóm waanice ñaatinaai eet ci ka kicin nɔ́nɔ́,
kepezta nɔ́nɔ́ ma kaanyeka kizi gi ci labak.”

Izaya 52.13-53.3

Ma bɛɛ o abor ɔl o gɔɔn ɛɛnyet ceezi ma aanyek kizi gi ci labak, bar tiitiny Joowa

Ivitaak zin niiga Manyi o rogeto. Atoobo niini ki bɛɛ
o tiitiny baal abor ɔl, ma aanyek kizi gi ci labak e. Bar
zin ɛɛra nɔ́nɔ́ Jooi, eeci niini tiitiny ɔrɔɔt ñaatin.
Eelnu zin buk niiga rogete cunooŋ o kiyo biyɛɛn o.
Abon zin ɛɛnycai ceez o Joowo vɔɔŋizo ñaatunooŋ.
ɛɛrawuŋ Jooi igeet iziti gabara cigin titiny ka aanyek
niiga nɔ́nɔ́ kaal o abon zinzeetinu o agamnyai ñaatin
goole o Yesu Kiristo. Kayabzei naana Yesu bɛɛ ci tiit-
iny o, eeci azi weregɛwi o Joowo nɛ, “Inoko kaareya
kutuur onan kazi Ziyɔn be ci titiny ɔrɔɔt ci kaɛra
naana. Ma ɛɛti ci ano nɔ́nɔ́, ajowa didi niini kaal o

katerkedei naana ol.”

Ma bæ nici titiiny oroot ñaatunoon igeet o atuyu nõõõ.

Maje bar olee o alaᅇ atuwe, atoobõ niigi ki ol o eeny-
cinto abor bæ o tiitiny kujuk gõõõgi.

1 Pitõr 2.4-7



Mayo Nuun Mā Kadaayito Ŋaan Kavɔ Kojowa gi o Kare Naaga Joowa Nɔko

*Ma mɔrɔzi aanyet ageet gawiin ci kagawi gi o keegine
naaga daayizok, maje buk werɛgewi o Joowo aduwaket gi
ci anyayi roget ci tiitiny ɔrɔɔt ŋaati kadaakti.*

Ceezi ogaac kaari kɔr loota ŋina kibeen ceezi ween didi o ɛɛl been nɛɛn tammu tadena

Zin giye nico alaŋ naaga kalaca eleti been nɛɛn, mayo nuun avɔ eleti cigaac o ki daayiz o, azaci bar tuwen onai kɔdɔk zinzeetine ogaac iinya dook nɔko. Ma piryakzet ci kapirnanɛ naaga noko gi ci miliny ter, ma alaŋ buk akɔ ŋinti wuun. Bar zin piryakzete nico aanyet tiŋeere Jooi ageet diŋdiŋɔn ci appe ɔrɔɔt ci abil been nɛɛn. ma gi nica appe ɔrɔɔt kujuk piryakzet nico. Alaŋ zin abon ŋaati kaareke naaga ooti piryakzet ci iinya ci miliny ter noko, bar abon kabaaban kaal o ŋaan kicinit inoko o, ma tiŋeere kaal nica ɛɛl nɔko been nɛɛn.

Ma eleti cigaac o loota ŋina ɛɛl kiyo ceezi o kari kɔr o. Kanyak naaga eleti nicoko ŋintimiliny. Mazi kadaai, kooŋnek looc ŋina. Kaga zin naaga ma kadaayito, ma kotoŋtek eleti nicoko looc, akɔ aanyet bodo Jooi ageet eleti ci colai tammu tadena. Agɔɔnaket ageet eleti

niceke Jooi ka korogit noko been neen. Inoko zin mā karɔɔŋ ka kɔɔtɔ kanyayit eleeti ci colai tammu tadenu neke kipirya naaga eleetine ci loocu noko labak.

Tiŋeere ma kadaai, alaŋ katoobɔ ki miniŋ o akɔm eleeti, bar kavɔ kanyak naaga eleeti ci colai. Maje inoko ŋinti ŋaan rak karogni naaga loota ŋina noko, kapirna ɔɔɔt. Alaŋ zin karɔɔŋ daayiz, bar karɔɔŋ eleeti o colai eel tammu tadena, ka eleeti cigaac adaai noko kirigizit gɔɔŋgja ci arogi been neen. Idimdimaneyet Jooi ageet gi nico laadun. Ma aanyet niini ageet Vɔɔŋiz onin ka keyeleyet ageet didi tiŋeere kajowa naaga kaal nicoko dook.

Zin giye nico kanyak naaga moozet tup noko . Eeci kaga naaga maŋaan rak kanyak eleeti ci loocu noko o, alaŋ rak karome ki Manyi tammu tadena. Ma ŋinti ŋaan kabaayi loota ŋina o, katu Manyi, bar zin ŋaan rak kacin nɔɔnɔ.

Keegin zin naaga moote, ma karɔɔŋ kotoŋit eleeti ci lootu noko ka kɔɔt koromte naaga ki Manyi tammu tadena.

Omoge Daayizi

Anyaa baale laadun daayiz looc eeti codoi tɔr noko. Ma buk goole ci atoobɔ ki nico, anyaa bodo ŋaazi daayiza eeti codoi tɔr noko. Zin buk kiyo adaai ɔl dook giye o eegine niigi dɔɔl ci dɔɔl o Adam o, buk tiŋeere

iñaani Jooi ol dook daayiza goole ci abil noko giye o oromtozeke niigi Yesu Kiristo. Ma kaala nici akanai katin kezeedjai noko., eeci itinja Kiristo daayiza owa niini. Zin katin ma abadaak niini looc, injaaz ol ogine atu noko dook daayiza. Ma vuruta iya ni looc dican. Ma iitene nice uulal katin Kiristo doyizok o alaat o loocu dook, kibeena alaalet o Loryento abali niini looc. Mazi odot, odoma ni niini aanyek baliin onin Jook ween baatinai. Abal tijeere Kiristo ol dook ze ma amog Jooi ol o amarnin noko dook. Aanyek ni Jooi Kiristo korocek noko looc zoone.

Ma vuruta omoge ni miroiti o atorneke een daayiz.

Azi werewewi o Joowo ne, “Aanyek Jooi jeerin korocek kaal dook looc zoone ogin.” Zin giye nico kaga naaga abal didi tijeere Yesu kaal dook. Ma zoaz nici alaj akati gi ci ka katin kabali Yesu Jook, eeci aanyek noko kabal kaal nicoko dook. Jooi alya. Ma iitene ci katin aanyeke Jooi Yesu Kiristo kaal dook e, buk niini alya ween jeerti Joowo abadaan ele kizi kidic naati baatin o aanyek noko kaal nicoko kabal, ka zin enice kabal kaal dook Jooi doon.

. . .

Izikto di juruun. Karoon kuduwayun gi ceen didi naan laadun kagawe ce. Atorneke waanma looci inaan ol ogen naatinai arogi noko. Enice mazi abee toromba o atorneke, aanyoneket ageet dook eeleeti ci colai enico ele kiyo abadi boroye o. Ma injaaz ol baal adaayito e dook

daayiza, ma aanyonek buk nɔɔgɔ dook eleeti ci colai. Ma alaŋ bodo naaga dook kadaai nɔkɔ been nɛn. Zin eleeti cigaac kanyak ame noko, abon ookci kiziti eleeti calaŋ ame. Ma eleeti cigaac gɔɔn adaai noko, abon ookci kiziti eleeti ci arogi nɔkɔ been nɛn. Zin katin waanci akanan kaala nici, ma utuye eleeti ci gɔɔn adaai noko kiziti eleeti cigaac arogi been nɛn, eɛemnyai didi koca zɔɔz o ayeedi weregewe o Joowo azi nɛ, “Otoorei daayizi. Omogun Jooi daayiz. Alaŋ bodo daayizi abada nɔkɔ been nɛn. Okɔma daayiz dɔyiz onin gɔɔn aruyi ɔl kadaayitɔ.” Gɔɔn laadun naaga kadaai o, eeci kanyak oŋec. Ma oŋeci anyak dɔyiz ŋaatinai o, eeci eyeleyet lotinowa o Joowo ageet kagaac oŋeci niini gitaaz. Abon zin naaga kaanyek Jook zaany, eeci aanyet niini ageet dɔɔyiz ci kamɔgi daayiz ŋaaten Manyi ona Yesu Kiristo.

Dɔl o yaai kareezuŋ, abon aruweku zɔɔ looc juruuŋ calaŋ amoonu tuwenta. Emeda iliŋliŋit liŋliŋɔn o Manyi Yesu tup, eeci agayu niiga liŋliŋɔnti ci aliŋliŋoneku

Okɔma balcɔn ma okɔma daayiz

Kicina ni tammu taden ci colai, ki looc ci colai. Maje tammu taden o reɛn been looc o reɛn been liilok iziti diim. Ma kacin kutuur o Joowo titiny kazi Jerusalem Colai. Akunak kutuuri nici looc Joowa tammu tadena.

Ma adimdiman Jooi kutuur nico kiyo kabarzeci o ayiŋyiŋan eŋe ka kitivice o. Ma kazii molok ci appe aku lecere o Joowo. Azi mɔɔyi nici ne, “Inoko iiya Jooi ka kiiya koromte ki ɔl o deer. Ka kabaayito niini ki nɔɔgo ŋaatodoi ka zin kiziti niigi ɔl cigin. Ma abaak Jooi niini alya ŋaatodoi ki nɔɔgo kizi niini Jook cineeŋ. Ka zin keeya niini nɔɔgo tilalo keberene ugeec. Okoma bodo daayiz, ki culum, been luwa ci aluwi ɔl. Ma okoma buk balɔn, eeci idicai kaala baal reen e dook lai.”

Wunozyak 21.1-4





Aku Bonati Ween Didi Kare Naaga Joowa Doon

Aduwa werɛɛwi o Joowo gi ci azi ne; rewinet tuwenta akati gi ci kare ka kutuguwe terkedinte o Joowo kujuk gi ci kare naaga ootine cigaac doon. Zin giye nico mǎ kaarek zinzeeti Jook giye ci kare akati zɔɔz nici gi ci kajezi ɲaan tiɲeere amɔg Jooi gerzitin ma aanyet kozolit naaga ki nɔɔnɔ mogin onin.

Kilip cinai ma een dɔɔyiz cinai neen Jooi

Kilip cinai ma een dɔɔyiz cinai neen Jooi,

areyi niini tup nɔkɔ ka kitiritet mǎ te gɔɔn anyak
lɔɔci gerzitin.

Zin giye nico alaɲ naaga kanyak ɲoliin, mayo nun mǎ
amɔt lɔɔci

Mayo nuun apalpalani maama liilowe ma iinak
biyeen liil o adikir eecitɔ;

amɔt biyeen ki looc gerzitin, anyak liil ci anyaa
talnin kutuur o Joowo,

ki ceez o Jook o adikir kujuk kaal dook.

Ma kutuuri nica Jook neen, ma alaɲ niini oyoki been
neen.

Mã akanai gerzitin atirte niini.

Ajul Jooi kanyayit modena ḡoliin ci appe,
ma amoot kutuuryowa o adikir ma azi looci ḡim.

Karome naaga ki Manyi o anyak doyz dook,
niini Jooi o Jakob lowen cinai neen.

Ivita zin icinit kaal o agoon Manyi,
icinit kaal o ateed ol biye agoon niini loota.
Abilni niini oroonok loocok dook,
ma aduul iriinya ki dilanya ma atooz kilibwa o
oroonto dook goya.
Azi niini ne; “Eelti oroon ma abon agayu keen naana
Jook o kadala moden dook ma kadala looc dook.”

Karome naaga ki Manyi o anyak doyz dook,
niini Jooi o Jakob lowen cinai neen.

Beninok 46

Inoko zin abil tirten ki deten to

Eeci kanyak alaan ci ceez o Joowo adikir ci adiŋdiŋ ɔɔɔt. Ook baale niini zee been Jook ele. Niini zin Yesu ween neerti Joowo neen. Ma alaani cinai adikir noko aga kaal o alaŋ naaga kanim kagaac, eeci baale buk niini iya izi eet ci deer, ma acinnyai kiyo naaga o, maŋaan niini kabaca baciin codoi been neen. Kanyayit zin goon naaga moozet ka kojoozot Jook baliinte onin ŋaao ka koot kojoktai naaga irken onin, ma kawucnek naaga noono. Ŋinaante ŋaan kajowa naaga tirten iiten ci goon te akunaket ageet piryakzet.

Ibiro 4.14b-16

Bar zin giye o areezet Jooi ageet, kuwucek naaga noono ɔɔɔt ele. Mayo nuun baale katobo ki ol ci adaai giye o kabacan oŋe e, iya Jooi orogozet niini doon bonate onin ŋaaten Kiristo. Mazin giye o koromtozeke naaga Yesu abil kiyo itinayet Jooi ageet been Kiristo daayiza, ma aanyet ageet kaavtiz buk aziite onin azo koromte ki Kiristo alaazete onin tammu tadena o. Agoon Jooi noko o ka keyeliza niini iinyaye ci ŋaan avu e dikiron o bonat onin giye o koromtozeke naaga Yesu Kiristo. Zin giye o ojoktayu niiga rogzen bonate o Joowo tuwenta, alaŋ agoonu gi nico niiga ootine cugooc, aanyuŋ igeet rogzen nico niini doon.

Alaŋ zin rogzen nici ajoyai kaale ci abon agooni, ka calaŋ adɔŋ ɔl eeleeti ŋuume o Joowo. Aruguzet zin Jooi ageet o, ka kutuguuz naaga kaal ci abon ŋaaten Yesu Kiristo. Idimdimanet niini ageet ka kiliŋliŋit liŋliŋɔn onin abon loota ŋina.

Evesos 2.4-10

Ka zin naaga kicinte wak

Aku katin iiteni ci aɔrneke kaala o aanyek dook Jooi ɔl. Tiŋeere dɔyizi o aduwan ɔl zozok o ayelzak nɔɔgo Jooi aɔrneke. Buk tiŋeere dɔyizi o azɔɔzi ɔl utugeetine ogen aɔrneke. Buk tiŋeere gɛenyizi aɔrneke. Maje reezinet abil niini nɔkɔ ma alaŋ aɔrneke been nɛen. Eeci gɛenyizi cinai kanyak inoko o, alaŋ een dook nɛen. Buk dɔyizi ci kuuwayi naaga zɔɔz o Joowo inoko o, alaŋ een dook nɛen. Bar zin tiŋeere iitene ci ayelzaket Jooi kaal o ween didi dook e, maje kaala o alaŋ een didi dook aɔrneke.


Baale ŋaan keen kidic e, kazooz eo dole o miliny. Ma kabaaban kaal goole o dole o miliny. Bar zin mazi kidikira o, kotoŋa kaal baal kidiczetu e dook. Ma kaala ci kacini naaga inoko o, eel kiyo riritɔɔni o gɔɔn kacini eeleeti maami o. Zin katin ma abada Yesu, ŋaan ayelzai kaala dook kicinit juruuŋ. Inoko rak alaŋ naana kaga kaal dook juruuŋ, bar zin tiŋeere ŋaan kaga naana kaal

dook juruun, kiyo buk agayaan Jooi aneet juruun o.

Anyak zin kaal ci eegin iiyu ci eel noko been neen,
tuwen, ki rewinet talniinta, been reezonet. Gi ci zin tiit-
iny oroot kujuk gonogi dook neen reezonet.

1 Korintiya 13.8 -13





Aterkedek Jooi Roget o Abil Been Neen ol o Atu Nɔɔnɔ Dook

*Ma ol o aritai loota njina dook , adaai katin, maje bar olee o
atu Yesu,omoge muuri o daayizo vooritine o ayselza gool o
akɔ rogete o abil been neen.*

Yesu niini gool ma een didi ma een roget

Ma anek Yesu nɔɔgo ne, “Má anyeku zinzeeti
kitiranyit, bar utuweec Jook. Utuyan aneet buk. Ma
korge o baaba anyak ceezi ci meelik ger. Inoko zin
naana kakɔ ka kook kidimdiman njintunooŋ. Mate waan
kizi gi ci azeeto, alaŋ waan kaduwakuŋ. Mazi kook
kidimdimana njintunooŋ o odota, ŋaan kabada bodo ka
kiiya kooyuŋ igeet, ka njinti kaave naana o, aavtiye niiga
buk. Agayu ri niiga gool ci akɔ ŋaati kakɔye naana o
nɔkɔ.”

Ma anek Tomaz nɔɔnɔ ne, “Manyi, alaŋ naaga njinti
akɔye niina o kagaya. Kagaya yo gool ci akɔye niina o
ku?”

Ma abedeke Yesu Tomaz anek ne, “Aneeta neen o
keen gool, ma keen didi, ma keen roget. Akom eet ci
akunak baaba calaŋ aduŋna niini ŋaaten aneet. Inoko

zin mǎ agawtaanju niiga aneet o, ŋaan agayu buk koca tiŋeere niiga baaba buk. Bar zin buk inoko agawtu ma icintu nɔɔnɔ laadun.”

Ma anek Pilip nɔɔnɔ nɛ, “Manyi, yeleyet da baatun, olla gi ci karooŋnya dook nɛɛn.”

Ma abedeke Yesu nɔɔnɔ anek nɛ, “Pilip, koromte naana ki igeet ŋinti wuun kal. Maŋaan niina gawan nɔkɔ? Ma zin azi nɛ, Yeleyet baatun o, naa? Ma ɛeti ci icinan aneet, icinun buk niini baaba. Pilip, alaŋ aga niina kaave naana ŋaati baaba, ma aavi buk baaba ŋaatan o? Ma zoozowa ci kaduwakuŋ igeet o, alaŋ kaduwa naana oowe caan doon, bar zin baaba o aavi ŋaatan agɔɔn liŋliŋɔn onin niini maany. Abon zin atuyaŋ niiga aneet zooze o kanekuŋ nɛ, Aavi baaba ŋaatan, ma buk kaave ŋaatin. Mǎ alaŋ atuyaŋ niiga aneet zooze nico, utuyaŋ kaale o kagoon. Didile kaduwakuŋ igeet, ma ɛeti ci atuyan aneet agɔɔn buk niini kaal o kagoon naana ɛɛ. Ma bar buk agɔɔn niini kaal ci adikir ɔɔɔt kujuk nicoko, eeci inoko kakɔ naana ŋaati baaba. Zin olla mǎ anyak gi ci ajinu niiga zaare ogan, ŋaan kagoonekuŋ naana igeet ka diŋdiŋɔni o baaba keyelzyai ŋaaten ŋɛerin. Mǎ anyak gi ci ajinaŋ niiga aneet zaare ogan, kagoonekuŋ.

Jɔn14.1-14

Kapirna inoko o ma tiijeere kajowa tiitinyon

Kaga naaga mā kayabiz titinyon o appe ka kaanyet Jooi ageet katin, kibeem piryakzet ci kapirnane inoko, piryakzet nici gi ci labak. Ma kaal o eenyca Jooi dook inoko areeyi talniinta, ma aron niigi iiten ci katin ayelzan Jooi dooyiz ogin e kiiya kataman. Areeyi niigi o, eeci iziti niigi dook kaal ci labak. Alan zin aanyek eleeti kiziti kaal ci labak niigi doon, bar aanyek noogo kiziti kaal ci labak Jooi. Anyak zin tiijeere iiten ci aarek Jooi ka koojai kaal ogine baal eenyca niini e dook kaale ci ger aanyek noogo kiziti gerze noko. Ka zin kotoozo niigi labak calan acab kaala ci gerze noko , ka buk kanyayit niigi tiitinyon kiyo doolya o Joowo o.

Kaga naaga kaal o eenyca Jooi dook naan apirna, ma naan niigi alu noko zee been inoko o kiyo naa o goon aam doole ka kotooyai o. Bar zin alan zin alan apirna ma alu kaala ogeen doon kaale o eenyca Jooi. Akom! Bar buk naaga alya o aanyet Jooi Voojiz onin ka keyeleyet kaal o abon ka kaanyet niini ageet katin, naan buk kapirna ma kalu noko. Naan zin kare naaga iiten o katin atalnanet Jooi ageet kiziti dool cigin baliinte onin, ma aanyet niini ageet eleeti ci colai e. Orogozet zin Jooi ageet giye o kareewi naaga kaal o abon ka kanyet tiijeere niini ageet tuwenta. Inoko te kojokta kaal ci naan kare noko, alan waan bodo kareeyi. Eeci goon laadun mā ojowa eeti gi ci da goon are, alan bodo areeyi. Inoko zin

mã kare naaga kaal ci ñaan kicinit neke, abon kare
zinzeetine ci alal zεε ma alam tiñeere kajowa.

Rom 8.18-25

Kaal cigañ zin bodo ogeen ci tiitinyik o

Bar buk zin naan kaanyeya kaal o loocu dook kizi kaal ci labak, giye o kōrōñe naana gi o abon doon. Tiitiny ñaatan ɔrɔt gawiin kujuk kaal nicoko dook gawiin o kagawε naana Manyi onan Yesu Kiristo . Zin giye cin kujukya kaal niceke dook tuu. Kanyeya nōngɔ dook kizi kaal ci ger een riiriny, ka kojowa naana gool o Kiristo. Ka zin buk kanyak naana ñintan ñaatin. Alañ karooñ bodo naana kobona dōyize ci εle caan o doon giye ci kazoone lotinok o Juz, eeci naana inoko kaga kanyawa bonat ween didi ñuume o Joowo giye o kutuwε Yesu. Gi ci adiñdiñ ñaatan ɔrɔt neen gawiin o kagawε Yesu been dōyiz o iñaani niini daayiza, ma karooñ buk kōzolta kibeen nōngɔ piryakzet onin. Ka buk kanyak naana tiitinyon daayiza kiyo buk baale niini e. Eeci karooñ ka kitiñayan Jooi daayiza ka kook rogete o abil been neen.

Vilipiya3.8b-11



Kaṅaryonek ɔl o Ajowa Piryakzet

Abon bai Manyi ona Yesu Kiristo o anyak ganon
aanyun igeet ganon tup noko goolowe dook. Abon bai
Manyi Yesu aavi ṅaatunoon dook.

2 Tesalonika 3.16





Yelzan o Wεεgenya o Tammo

Terkediin o Rεεn

Lotinok o vuruto

10.17-22.....19

Beninok

23.....11

46.....29

103.....15

Izaya

52.13-53.3.....20

Jona

2.1-9.....12

Terkediin o Colai

Matiyu

9.9-13.....8

11.28-30.....18

Jon

12.44-50.....7

14.1-14.....35

15.1-17.....9

Rom

5.1-11.....17

8.18-25.....37

8.31-39.....13

1 Korintiya

13.8-13.....32

15.21-28, 51-58.....24

2 Korintiya

4.16-5.8.....23

Evesos

2.4-10.....31

Vilipiya

3.8b-11.....38

2 Tesalonika

3.16.....39

Ibiro	
4.14b-16.....	31
5.7-9.....	10
1 Pitor	
2.4-7.....	21
Wunozyak	
21.1-4.....	26

